

Pita Ya Iginuma Naona

Buki Taina Wayahina

Buki taina a tau ginuma vivane Pita, Iesu a tau hae ananina aitam, ka Aniduru vaneina. Pita kadu aitam buki ginumi *Awaeha Vovouna* taina nihenina.

Ka leta taina nihenina Pita yana ipupu habuhabuna inahe wayahina kana-iavi. Inahe nihenina dewa aitonu kadueyei. (1) Inahe wayahina Kauvea ya nuanua kaivaitei. (2) Inahe ivaiteka yaka vitumahana kavo-patei mani tomotau wayahia. (3) Inahe wayahina nau-dadana kavaniahei, ka dewana yaka vitumahana vo-vi-natei.

Pita tau ekalesia vonei Iesu aniga tau wayahi, ka mini-havine wayahi, ka kadu tuta tepakaia wayahina tauna na-mavi-havine wayahi. Ka dewaia tanoi wayahi, tau nau-wawani idewa-haiawa ai inahe niwania. Iuna yai nua-vaniaha nui ipotapota auyewana wayahina. Ka avaha ianamanai avi tuta Iesu na-mavi-havine, tau ai nau-pata ahiahina kadu nau-iaiava ivaniahei tauna wayahina.

Ka Pita ya nuanua, itoka tau ekalesia yawaika ahiahina mani tomotau kaviwavenei, tauka vivane Tau Ito-yavuha ya tomotau.

Nau-kaiwa

¹ Yauke Pita, Iesu Tau Ito-yavuha a tau hae ananina aitam. Ka yami leta taina omomo wayahiua. Itomi vivane Yaubada ya tomotau, ka nonova aka havia ivo-tahomi uneine papani tunina tunina wayahia, vivane Ponitusi, ka Galatia, ka Kapadusia, ka Asia, ka kadu Bitinia. Ka tuta ataina wayahina papani-naia nihenia umamaei.

² Nonova Yaubada Amaka dewa habuhabuna mai-anamanei. Wayahina, tauna vi-nua-dadanemi Iesu Tau Ito-yavuha yana vona uvi-ateteyei. Kadu tauna Nuana Ahihinata vi-tunei omo wayahimia, e tauna Yaubada ya paisewa nuami nihenina na-nau-yehai. Akaka, Nuana Ahihinata ivaitemi Iesu dayahina un'-awaehei yami goyona n'-epa-yavunei. Wayahina, anau-kaiwemi, ka yau nuanua Yaubada am-venena awawaehina kadu nua gomagomanina na-venemi inatanata nihenimia.*

Vitumahana Iesu Tau Ito-yavuha Wayahina

³ Nau-wawanika Yaubada, yaka Kauvea Iesu Tau Ito-yavuha Amana, kan'-awa-vidovidohei! Iuna tauna ate-nuanuaieka ananina. Ka tauna Iesu anigea si-vi-mini-havinei, e ya bagibagi kadueyei deinake. Dewana wayahina ate-nuanuai kavaniahei tauna wayahina, vivane yaka tupua vovouna. Ka ataina, yaka nua-vaniaha nui kapotapota a itoava tauna na-si-vi-mini-havineka aitamoata deina wayahina.

⁴ Ka tanoi wahuma wayahina kaikaiwabo ahihinata imamaei, vivane yana gabu ima'-vavaha.

* **1:2:** Rom 8:29; 2Te 2:13.

Tauna bou-vidovidohei wayahimi, ka eha ana pata kaikaiwaboi idavudavuna, ka eha ana pata ina-iakwa.✧

⁵ Ka itomi Yaubada uvitumahanei, ka ya bagibagi ana pata goyona na-bou-potei wayahimia tuta ataina a itoava auyewa pai nau-yehata wayahina. Ka auyewa pai nau-yehata wayahina, Yaubada yaka ito-yavuha na-si-vin'-omanei kadueyei kadu kavaniahei.✧

⁶ Wayahina, dewaia wayahi udewa-haiawa ananina. Kate vona ahiahina, tuta nonova a itoava tuta ataina wayahina, inahe habuhabuna uvaniahei nau-dadana tunina tunina wayahia. Ka avonemi, inahe-naia uvaniahei yaka tuta tanopia kutakutana ana heta nihenina.✧

⁷ Nau-dadanaia tanoi habuhabui ivin'-omo, iuna Yaubada awaehei deina. Tauna ya nuanua habuhabuka aka pata yami vitumahana kadueyei eha vitupu, kate vitumahana-hoina. Itoka tomotau yaka dewa vivane goulav kabou-anai, ka aviani nihenina eha goulav n'-anai na-iakwa, ka goulata ana heta na-maei. Vona ahiahina, goulata patana ananina, kate udu! Auyewa pai nau-yehata wayahina goulav habuhabuna na-iakwa. Kate auyewana wayahina yami vitumahana Iesu wayahina eha na-iakwa. Wayahina, eha aitam patana mamae ana pata yami vitumahana wayahina. Yaubada ya nuanua auyewana wayahina, Iesu Tau Ito-yavuha ya mavi-havine kadueyei, e auyewana wayahina Yaubada

✧ **1:4:** Kol 1:12. ✧ **1:5:** Ioni 10:28; 17:11. ✧ **1:6:** 1Pi 5:10; Iam 1:2.

n'-awa-davedaveka, n'-awa-vidovidoheka, kadu didigaka na-veneka.✧

⁸ Itomi eha Iesu matamia uta-dueye, ka dewana eha aitam aviani wayahimia, akanai tauna udewa-vidovidohei. Ka ataina tuta wayahina, kadue eha matamia uta-dudueye, ka akanai, tauna uvitumahanei, ka yami dewa-haiawa tauna wayahina ananina. Ka eha ana pata vona wayahia dewa-haiawana kavo-vi-mahete mani tomotau wayahia. Ka dewa-haiawana didigaka omaneka kavanaiahei.✧

⁹ Udewa-haiawa deinake, iuna avaha uvitumahanei, kadu nuami a ito-yavuha avaha vi-putu, ka avaha uanamanei, apaina kadu ito-yavuha-nana a pai nau-yehata uvaniaiei.

¹⁰ Ito-yavuha-nana vivane dewa ani-vainena. Nonova tau apa-taputapu habuhabui inaunau-nene-wayohe ito-yavuha-nana an' anamana ivaniaie, in'-anamane ahiahina. Ka tau habuhabui iginumi, e apaina am-venena awawaehina Yaubada wayahina uvaniaiei.✧

¹¹ Taiu iginumi deinake, iuna Tau Ito-yavuha Nuana tau nihenia mamaei, ka Nuana mai-viwavenei, apaina Tau Ito-yavuha nau-wawani inahē habuhabuna na-vaniaiei tanopia, ka kadu mai-viwavenei, inahē-naia na-iaakwa, e tauna didigana na-vaniaiei. Kate tau eha it'-anamane-vidoha avi tuta wayahina dewaia in'-omo, ka eha it'-anamane-vidoha koiaka wayahina ivin'-omo, kate tau yai nuanua dewaia in'-anamanei.✧

✧ **1:7:** VT 17:3; Sek 13:9; Mal 3:3; Iam 1:3. ✧ **1:8:** Ioni 20:29; 2Ko 5:7. ✧ **1:10:** Mat 13:16-17. ✧ **1:11:** Sam 22; Isa 53; Luk 24:26-27.

¹² Ka tau apa-taputapu-naia ivi-tau paisewa kadu dewaia iginuginumi, ka Yaubada viwavenei eha tau ai heta wayahi idedewe, kate ivi-tau paisewa itomi wayahimi kadu wayahimia iginuginuma. Nonova dewaia iapa-taputapuei, ka tuta ataina wayahina dewaia avaha ivin'-omo. Ka Yaubada tauna Nuana Ahihinata ya bagibagi wahuma wayahina tupwai tomotau venei, e taui Vaneana Ahiahina inaunau-waheyei wayahimia. Ka vona ahiahina, anelose wahuma imamaei, kadu yai nuanua ananina dewaia in'-anamanei.

Dewa Ahihinata

¹³ Wayahina, nau-wawanimi nuami uvo-vi-aiaia, uvo-vi-vatui, kadu yawaimi uveimeyei ahiahina, Yaubada ya nuanua wayahimi deina. Kadu nau-wawanimi utoha-vi-anaimi, ka yami nua-vaniaha nui upotapota a itoava Iesu Tau Ito-yavuha na-mavi-havine wayahina. Ka auyewana wayahina tauna am-venena awawaehina na-venemi matana.

¹⁴ Nonova itomi mwagemwagemi, kadu yami nuanua vivane goyogoyona. Kate ataina nau-wawanimi dewaia uni-tawanei, ka Yaubada ya nuanua wayahimi uvi-munie, uaupu-moimoiha. Udedewei tevana tunutunuhi amai yana vona iupu-moimoihei deina.✧

¹⁵ Ka tauna hone-taitainimi vivane ahihinata. Wayahina, nau-wawanimi itomi kadue ahihimi-ata yami dewa habuhabuna nihenina.

¹⁶ Nau-wawanimi udedewei deina, iuna Iginuma nihenina Yaubada ivona,

✧ **1:14:** Rom 12:2; Epe 2:3; 4:17-18.

“Itomi nau-wawanimi ahihimiata,
iuna Yauke Taua ahihiuata.”✧

¹⁷ Apaina Yaubada onoto ka vavine aitamoata aitamoata yai dewa kadu tauna ya nuanua wayahi na-bou-viwavei, na-nau-yanahi, e ai nau-pata vi-nua-dadani, dewa-haiawa o kadi dewa-yaiyai. Ka ataina tuta wayahina Amaka wayahina uviama. Wayahina, nau-wawanimi dewa-yaiyai-nana umatamatautei, kadu yawaimi uvo-vi-aiiaia ahiahina. Iuna tanopi taina eha yami pai ma¹-vavaha. Nau-wawanimi baina tanopia umamaei tau bwanibwani deina. Wayahina, dewa goyona uvihahaiei.✧

¹⁸ Nonova yami tupua-nenenehi yai dewa awakabina. Ka ataina dewaia iviwavenemi uvi-munie. Ka Yaubada vi-maiemi, iuna ya nuanua dewaia uni-tawanei. Ka patana eha kina goulav o kadi kina silivav. Eha. Apaina guguaiia ina-iakwa.

¹⁹ Kate patana ani-vainena vivane yaka Tau Ito-yavuha dayahina. Ka tauna Yaubada yana vona vi-munie tunutunuhina, aitam lamiv a tau dune-vi-avina vi-munie deina. Eha yana dewa goyona, kadue eha aitam aviani goyona tauna nihenina ta-mamae. Tauna ahihinata.✧

²⁰ Tuta naona wayahina, Yaubada eha tanopi ta-vevewane, kate tauna avaha Tau Ito-yavuha mai-vi-nua-dadanei paisewana vitana tanoi wayahina. Ka Yaubada tauna ya vi-nua-dadana tanoi hivehivei a itoava tuta ataina wayahina. Ka

✧ **1:16:** Lev 11:44-45; Mat 5:48. ✧ **1:17:** Rom 2:11; SiV 2:23.

✧ **1:19:** Dew 20:28; Ebe 9:12-14.

ataina, tuta a pai nau-yehata wayahina, tauna si-vin'-omanei wayahimi.✠

²¹ Ka avaha Iesu yana dewa ai nahenahea uanamanei, Yaubada uvitumahanei. Ka Yaubada yaka Tau Ito-yavuha anigea si-vi-mini-havinei, kadu didigana ananina venei. Wayahina, Yaubada uvitumahanei, kadu ataina tuta yami nua-vaniaha nui upotapota kadu utoha-vi-anaimi, e apaina ami nau-pata ahiahina uvaniahei.✠

²² Ka avaha Yaubada yana vona tunutunuhina uvi-munie, ka yawaimi uvo-vi-aiaia ahihimiata deinake. Wayahina, ataina ami pata tau ekalesia aitamoata aitamoata udune-nuanuaiei ahiahina. Wayahina, nau-wawanimi nuami habuhabuna wayahina udewa-vidovidohemi, dewa tunutunuhina deina.✠

²³ Iuna itomi avaha utupua-havine Yaubada yana vona wayahina. Ka yana vona vivane yawayawaina kadu ma'-vavaha. Kadu tauna ma'-vavaha, eha yami tupua-nenenehi aninigai deina. Ka ataina Yaubada vivane Amami.

²⁴ Ka Iginuma voneka deina, ivona,

“Tomotau habuhabui yawai wetau yawaina deina,
ka yai kaikaiwabo wetau sisina deina.

Iuna apaina, tuta eha ani-hoina na-iakwa wayahina,
wetau ina-pwavu, ka sisina inau-moewa.✠

✠ **1:20:** 2Ti 1:9-10; Epe 1:4.

✠ **1:21:** Ioni 14:6; Rom 5:1-2.

✠ **1:22:** Ioni 13:34; Rom 12:10.

✠ **1:24:** Isa 40:6-8.

25 Kate Kauvea yana vona ma'-vavaha.”^a

Ka nonova Yaubada ya tau paisewa vonana ma'-vavaha inau-waheyei wayahimia, e unononi, vivane Vaneana Ahiahina.

2

Ohona Yawayawaina

¹ Wayahina, nau-wawanimi yami nua-goyo kadu yami vitupu ubou-ohoi, ka nau-wawanimi yami vi-bwanou kadu yami apa-goyogoyo uviha-haiei.*

² Meameai vovou tuta tuta wayahina nunu nuanuai. Ka itomi nau-wawanimi yami dewa meameai yai dewa deina, vivane tuta tuta wayahina Yaubada yana vona tunutunuhina nu-anuami nunu deinake. Ka aituhu unononi, ubag-ibagi, e apaina ito-yavuha uvaniahei.

³ Vona ahiahina, avaha yaka Kauvea yana vona unim-dadani, ka avaha uanamanei vonana dibidibina, iuna tauna ahiahina.*

⁴ Kadu nau-wawanimi un'-omo Tau Ito-yavuha wayahina, iuna tauna ohona yawayawaina. Nonova tau ma' tanopi ivihahaiei, iuna tauna eha aitam aviani ananina tau mataia. Kate tauna ananina Yaubada matana, kadu Yaubada tauna vi-nua-dadanei, e ana wava bou-vaneyei wava habuhabui wayahia.

⁵ Kadu ataina tuta itomi yoana yawayawaina deina, ka Yaubada ya nuanua n'-epami, e

^a **1:25:** Me Girisi yai vo-vina *Awaeha Tutuaina* nihenina Isaia 40:6-8 ivona deinake. Kate me Israeli yai *Awaeha Tutuaina* nihenina ivona tunina. * **2:1:** Epe 4:22; Iam 1:21. * **2:3:** Sam 34:8.

ohona yawayawaina nui Manua Tapanono na-yonei. Ka itomi avaha uvi-tau vi-nomu Yaubada wayahina. Akaka, nau-wawanimi nuami wayahina vi-nomu ahihinata uvi-nomui Yaubada wayahina, tauna ya nuanua wayahimi deina. Ka Iesu Tau Ito-yavuha na-ivaitemi uvi-nomu ahiahina deina.✧

⁶ Ka Iginuma nihenina ivona deina,

“Udueyei! Ohona ahiahina avi-nua-dadani,
ka avi-au-mini meagai SioniV nihenina.

Ka aituhu aviyaivia ohonana ivitumahanei,
ataina a itoava auyewa pai nau-yehata wayahina,
taui eha ina-ini-yauyau.”✧

⁷ Ka aituhu aviyaivia wayahimia ohona tanoi uvitumahanei, akanai, ohonana ahiahina ana noe. Ka aituhu aviyaivia eha ita-vitumahane, taui wayahi Iginuma vo-vi-maheteka, ivona,

“Nonova tau yona ohonana ivihahaiei,
kate Yaubada ohonana bou-vaneyei hetana,
e mani ohona na-veimeyei.”✧

⁸ Ka kadu ivona,

“Ohona taina vivane tomotau yai pai tupa,
aitam hanu wayahina ivi-tupainei deina.”

✧ **2:5:** Epe 2:21-22; SiV 1:6. ✧ **2:6:** Isa 28:16; Epe 2:20. ✧ **2:7:** Sam 118:22.

Apaina tauna wayahina ivi-tupainei ina-peu, iuna eha yana vona ita-vitumahane. Ka nonova Yaubada avaha vi-nua-dadani aituhu aviyaivia ivihahaiei, akanai ivi-tupainei deina.✧

⁹ Kate itomi eha tau deina, iuna itomi uvitumahanei. Yaubada yaka kiniV vi-nua-dadanemi uvi-tau vi-nomu tauna wayahina. Ka itomi tau vitumahana habuhabumi yoko ahihimiata. Nonova tauna papani novanovana wayahina honemi, un'-omo. Ka ya nuanua ya maheta ahihi-vainena nihenina umamaei. Ka nau-wawanimi ya dewana ahiahina tanoi uapa-vidovidohei kadu dewaia uhaeyei.✧

¹⁰ Vona ahiahina,

“Tuta nonova wayahina
itomi eha aitam yoko,
kate ataina tuta
itomi avaha Yaubada yana yoko.
Ka nonova kadue Yaubada yan' ate-nuanuai
eha wayahimia,
kate ataina avaha uvaniahei.”✧

¹¹ Yaiiau, avaha avonemi, itomi tau bwanib-wani tanopi taina hetana deina, iuna tanopi taina eha yami pai ma' pai nau-yehata. Yami pai ma'-vavaha vivane wahuma. Wayahina ahaeyemi, nau-wawanimi yami nuanua goyona aitamoata aitamoata uvihahaiei. Iuna nuanuaia goyona ami havia, ka nuami ivi-nauei.✧

✧ **2:8:** Isa 8:14. ✧ **2:9:** VV 7:6; 14:2; Isa 9:2; Tit 2:14; Dew 26:18; Epe 5:8. ✧ **2:10:** Ose 2:23. ✧ **2:11:** Gal 5:17, 24.

12 Ka itomi nau-wawanimi dewa ahiahina udewa-nubunubui tau ma' tanopi mataia. Tai eha Yaubada it^l-anamane, wayahina iapa-goyogoyoemi. Ka aituhu yami dewa ahiahina idudueyei, akanai, yami dewaia na-haeyei yai nuanua bwagona. Ka apaina, Tau Ito-yavuha na-mavi-havine, na-nau-vi-tauka, ka auyewana wayahina tau ma' tanopi nau-wawani ihaeyemi tunuhina Yaubada matana, ka tauna didigana ivo-vi-natei deina.✧

13 Ka yaka Kauvea ya nuanua wayahimi nau-wawanimi tau veimea habuhabui tanopia udewa-didigunei. Wayahina, SisaV ya veimea habuhabui uvi-munie, iuna tauna tau veimea ananina.✧

14 Kadu tau veimea mata-genai yai veimea uvi-munie deina, iuna SisaV vi-tunei iomo, e aituhu aviyaivia veimea-naia itana-bwegebwegei, akanai tau veimea mata-genai idewa-yaiyaiei. Kadu aituhu aviyaivia yai dewa tunutunuhina, akanai tau veimea mata-genai iap^l-ahihiei.

15 Nau-wawanimi udewei deina, iuna Yaubada ya nuanua wayahimi dewa ahiahina udewa-nubunubui. Ka aituhu aviyaivia mwagemwagei ivona-kavokavovo wayahimi, apaina yami dewa ahiahina idudueyei, ka eha kadu aviani wayahimi ina-vone.✧

16 Yaubada avaha ito-yavuhimi yami goyona wayahia Iesu yana dewa wayahina. Ka ataina veimea tutuaina eha ana pata na-ito-yavuhimi. Kate udu! Eha nau-wawanimi una-vona, "Itoi

✧ 2:12: Mat 5:16. ✧ 2:13: Tit 3:1. ✧ 2:15: 1Pi 3:16.

avaha ito-yavuha avaniahehi. Wayahina, aviani yama nuanua, akanai adedewei deina.” Kadu eha nau-wawanimi yami dewa goyona ubwae deinake. Kate tuta tuta wayahina yawaimi un¹-awaehehi Yaubada ya nuanua wayahina, ka eha dewa goyona udedewe.

¹⁷ Kadu nau-wawanimi tomotau habuhabui udewa-didigunei, ka yaiami tau i Iesu a tau vitumahana udewa-vidovidohehi. Kadu nau-wawanimi Yaubada umatamatautei, kadu yami kini^V udewa-didigunei.✧

¹⁸ Ka aituhu aviyaivia wayahimia vivane tau paisewa-kavokavovo,^a nau-wawanimi yami babada udewa-didigunei, ka aviani ami veimea tau wayahia, akanai uvi-muniehi. Ka eha babadai ahiahina ai heta wayahia, kate aituhu tau ami veimea toyoina ivenevenemi, akanai kadu tau uvi-muniehi ahiahina.✧

¹⁹ Aituhu yaka Yaubada unuani, apaina eha aitam yami dewa goyona. Kate aituhu yami babada inua-goyo, ka aituhu idewa-yaiyaiemi, itomi Yaubada uvo-vi-dewa-haiawi yami dewa ahiahina wayahina.

²⁰ Kate aituhu goyona udedewei, ka aituhu inua-goyo, idewa-yaiyaiemi, yami dewa tanoi eha aitam aviani ahiahina Yaubada matana. Kate aituhu dewa ahiahina udedewei, ka aituhu inahe uvaniahehi dewaia wayahia, dewana vivane dewa ahiahina Yaubada matana.✧

²¹ Ka etawana vitana tanoi wayahina Yaubada honemi uvenavenau, iuna Tau Ito-yavuha in-

✧ **2:17:** Rom 12:10. **a 2:18:** Dimdim movia tau paisewa-kavokavovo ivi-wahani *sileva*. (Edu *sileva Vona nihenina*.) ✧ **2:18:** Epe 6:5. ✧ **2:20:** 1Pi 3:14, 17.

ahē vaniaheī wayahimi, ka yana dewa vivane pai dune wayahimi, ka Yaubada ya nuanua pai dune-nana uv^l-iunei.✧

²² Iginuma nihenina tauna wayahina ivona,

“Eha aitam dewa goyona ta-dewe,
ka eha aitam vitupu ta-vin^l-omo
awana wayahina.”✧

²³ Ka tutana tomotau iapa-goyogoyoei, tauna eha kadu wayahia ta-nau-pata apa-goyogoyona wayahina. Ka tutana inahe ananina vaniaheī, eha ta-nua-goyoe, ka eha ta-bwanate. Kate tauna yawaina awaeheī Yaubada wayahina, ka kadu tuta tuta wayahina vitumahaneī Yaubada ya nau-yanahi tunutunuhina, eha aitam tuta bwagona.✧

²⁴ Vona ahiahina, yaka Tau Ito-yavuha ana heta ininina nihenina yaka goyona a dewa-yaiyai vaniaheī ai nahenahea. Ka ya nuanua dewa goyona habuhabui kani-tawaneī, e dewa tunutunuhina nui kamamaei. Nau-wawanika kadedeweī deinake, iuna tomotau tauna ininina ivo-himwani, akaka, itoka kavidoha a nipaha wayahia.✧

²⁵ Vona ahiahina, itomi vahitau sipiV deina. Ka nonova uni-tupatupa, kate ataina avaha yami Tau Ito-yavuha wayahina umavi-havineī. Ka tauna vivane nuami a tau dune-vi-avina.✧

✧ **2:21:** Mat 16:24; Ioni 13:15. ✧ **2:22:** Isa 53:9. ✧ **2:23:** Isa 53:7; 1Pi 3:9. ✧ **2:24:** Isa 53:5-6; Rom 6:11. ✧ **2:25:** Ese 34:5-6; Mat 9:36; Ioni 10:14; Ebe 13:20-21.

3

Tau Tavine Vaivine Ai Veimea

¹ Ka aituhu aviyaivia wayahimia tau tavine vaivinemi, nau-wawanimi yami nua-opu nui yami onoto yai vona uvi-ateteyei, tau paisewa-kavokavovo yai babada ivi-ateteyei deina. Kadu ataina tuta wayahina, aituhu aviyaivia wayahimia yami onoto eha Yaubada yana vona ivitumahane, aituhu tau eha yami vona inononi, kate aituhu yami dewa ahiahina idudueyei, apaina kadi ivi-putu Yaubada ivitumahanei.✧

² Ka aituhu yami dewa ahiahina idudueyei, ka aituhu yawaimi tunutunuhina idudueyei, akanai in'-anamanei yami vitumahana vivane tunutunuhina kadu ahiahina.

³ Eha nau-wawanimi yami nuanua ananina ininimi uvaivani, o apanami udedewe ahiahina, o kadi ahekwasigoulaV uweteweteni, o kadi kwama ahiahina uweteweteni deina.✧

⁴ Kate itomi nau-wawanimi yami nuanua ananina nuami uvaivani. Aituhu nuami udewa-vidovidohei yami nua-opu wayahina, ka aituhu nihenimia nua gomagomanina mamaei, vaivana tanoi eha na-iakwa, kadue dewa tanoi dewa ananina Yaubada matana.

⁵ Tuta nonova wayahina avi tau tapanono vaivinei Yaubada ivitumahanei, tau ai vaivana nuai nihenia, vivane ivaivani dewa bigana wayahina kadu nua-opu wayahina. Ka kadu tau awawai idewa-didiguna-neiei.

✧ **3:1:** Epe 5:22. ✧ **3:3:** 1Ti 2:9.

6 Nonova Sara awai Abaraham movina iaupu-moimoihei deina, ka iawaehei tauna ai tau veimea. Ka aituhu itomi dewa tunutunuhina uvi-munie, ka aituhu eha matauta uawaehe yawaimi na-veimeye, akanai, itomi yawaimi ahiahina Yaubada matana, Sara yawai deina.✧

Tau Tavine Ononotoi Ai Veimea

7 Kadu aituhu aviyaivia wayahimia tau tavine ononotomi, itomi nau-wawanimi yami vavine unuani tau ihanuai, kadu nau-wawanimi uapa-vidovidohei, ka udune-vi-avini ahiahina. Iuna itomi yami vavine nui yawai-vavaha Yaubada wayahina uvaniahei. Tauna am-venena awawaehina tanoi venemi deina. Ka aituhu eha yami vavine udune-vi-avini ahiahina, apaina Yaubada eha yami viama na-nau-pata ahiahina.✧

Tau Ekalesia Habuhabui Ai Veimea

8 Ka yau vona a pai nau-yehata habuhabumi wayahimia, nau-wawanimi una-ivaitemi umamaei ahiahina, kadu yami dune-nuanuai nui udewa-vidovidohe mi aitamoata aitamoata. Kadu nau-wawanimi unua-opu kadu un¹-ate-nuanuaiemi.

9 Ka aituhu yaiami tupwai idewa-goyomi, eha nau-wawanimi ai nau-pata wayahina udewa-goyoi. O aituhu itana-wavinimi, eha nau-wawanimi ai nau-pata wayahina utana-wavini. Kate nau-wawanimi uapa-vidovidohei. Ika, dewana Yaubada ya nuanua wayahika, iuna ya nuanua wayahika ahiahina kavaniahei.

10 Ka Iginuma nihenina ivona deinake, ivona,

✧ 3:6: Nao 18:12. ✧ 3:7: Epe 5:25.

“Aituhu koiaka tauna ya nuanua
 dewa-haiawa na-vaniahei
 auyewa habuhabuna wayahia,
 akanai tauna nau-wawani
 vona-kavokavovo kadu vitupu
 ainua na-bou-ohoi.✧

11 Ka kadu nau-wawani
 dewa goyogoyoi vihahaiei,
 ka dewa ahiahina dedewei
 mani tomotau wayahia,
 ka kadu nau-wawani
 bebebewa bagibagina
 nua gomagomanina wayahina.

12 Iuna tuta habuhabuna wayahina
 yaka Kauvea tau ahiahi habuhabui
 dune-vi-avini,
 kadu yai viama nononi ahiahina,
 kate tau goyogoyoi vihahaiei.”

13 Aituhu yami nuanua ananina ahiahina udedewei, koiaka ya nuanua vi-goyomi? Eha tomotau habuhabui.

14 Ka aituhu aitam koiaka mamaei, ka aituhu ya nuanua vi-goyomi, eha dewana unuani ananina. Iuna aituhu dewa ahiahina udedewei, ka aituhu inahe uvaniahei dewaia wayahi, akanai Yaubada nau-iaivami. Ka Iginuma voneka deina, ivona,

“Eha nau-wawanimi umatamatauta
 mani tomotau imatamatauta deina!
 Eha yai vona panina umatamataute.”✧

✧ 3:10: Sam 34:12-16. ✧ 3:14: Isa 8:12-13; Mat 5:10; 1Pi 2:20; 4:14.

15 Kate nuami nihenina nau-wawanimi yami Kauvea Tau Ito-yavuha uvitumahanei, kadu udewa-didigunei. Ka aituhu koiaka vi-tanaيمي, na-vona, “Aviani iuna yami nua-vaniaha nui upotapota deina? Uvo-vi-maheteu an'-anamanei.” Ka nau-wawanimi uvo-vi-aiami, e yami vona-nau-pata ahiahina umai-nuani. Ka eha yami nua-goyo nui uvona-nau-pata, kate yami vona bigana wayahina uvo-vi-mahetei.

16 Ka avi dewa avaha uanamanei dewa tunutunuhina Yaubada matana, tuta habuhabuna wayahina nau-wawanimi dewaia udedewei. Ka munia, ami ayaunena hadahadanina mamaei deina. Ka aituhu aviyaivia ivona-goyoemi, iuna itomi Tau Ito-yavuha a tau vi-muni-waiwai, akanai, apaina yami dewa ahiahina inuani, ka ina-ini-yauyau yai vona-kavokavovo wayahia.✧

17 Unuani, aituhu Yaubada ya nuanua in-ahe uvaniahei, nau-wawanimi inahena uvaniahei iuna dewa ahiahina udedewei, ka eha nau-wawanimi inahena uvaniahei iuna dewa goyona udedewei.

18 Pai dune avenemi. Vona ahiahina, yaka Tau Ito-yavuha kadu inahе vaniahei tanopia. Tauna yana dewa tunutunuhina ana noe, kate itoka yaka dewa bwagobwagona. Tauna itoka tau goyogoyoka habuhabuka yaka goyona a nau-pata epei ininina ai nahenahea. Tauna dewei deina, iuna ya nuanua na-omaneka Yaubada wayahina. Tuta aitamoata-hoina wayahina ininina aniga. Vona ahiahina, tomotau ininina inau-vi-anigi,

✧ 3:16: 1Pi 2:12.

kate ya mini-havine munia, tauna nuana kadu ininina ima'-vavaha.

¹⁹⁻²⁰ Nonova Noa ya tutea, tau ma' tanopi goyogoyoi imamaei. Ka tutana Noa wae yoneyonei, Yaubada potapota-wayohe tomotau yai nua-vinana wayahina. Noa naunau-wahei, kate tau y nau-wahena ivihahaiei. Ka munia, diwaya ani-vainena omoi, ka tomotau ai yau 8 ai heta wae-nana nihenina ito-yavuha ivaniahei daudau-nana wayahina. Ka tomotau habuhabui igavivina diwaya nihenina, ka Yaubada nuai yohoyohoni aitam papani wayahina, e tau manua yohona nihenina imamaei deina. Ka Iesu yan' aniga munia, nuana iopu, omo tomotau-naia nuai wayahia, e nau-wahe-havinei.☆

²¹ Nonova daudau-nana wayahina Noa yana yoko ito-yavuha ivaniahei. Wayahina, ataina tuta wayahina kana-vona daudau-nana aitam pai dune aka bapitaiso wayahina. Iuna tuta ataina wayahina daudaua kavi-bapitaiso, ka dewana wayahina tomotau kaviwavenei avaha yaka goyona wayahia kanua-vinana, e aka ayaunena wayahina Yaubada kavi-muni-waiwaiei. Ka bapitaiso-nana eha ininika a pai toa. Eha. Bapitaiso-nana aka ayaunena a pai toa. Nonova Iesu Tau Ito-yavuha avaha mini-havine anigea. Ka itoka kavitumahanei apaina Yaubada na-si-vi-mini-havineka aitamoata deina. Wayahina, kavi-bapitaiso, ka aka ayaunena nihenina kanamanei yawaika avaha vidoha Yaubada matana.

☆ **3:19-20:** Nao 6-7.

22 Ka Iesu avaha ivane wahuma, ka tuta ataina wayahina Yaubada ateina mamaei. Ka tauna tau ma' wahuma habuhabui veimeyei, vivane anelose habuhabui, ka wahuma a tau veimea habuhabui, ka kadu wahuma a tau bagibagi habuhabui.

4

1 Tutana Tau Ito-yavuha vi-tomotau tanopia, tauna inahe ininina vaniahei. Wayahina, nau-wawanimi unuanua ana pata inahe kadu uvaniahei deinake. Ka aituhu unuanua deina, uvo-vi-aiami kadu uvo-vi-vatumi auyewa vitai wayahia. Kadu nau-wawanimi dewa taina unuani. Aituhu aviyaivia inahe ininia ivaniahei, tau nihenia goyona a bagibagi na-opu.✧

2 Ka aituhu yawaimi nihenina inahe uvaniahei deina, akanai, aituhu avi tuta inahe-naia ina-iakwa, akaka eha yami nuanua tuta tuta wayahina goyona udedewe, kate yami nuanua ananina Yaubada ya nuanua udedewei.

3 Nonova, tuta tuta wayahina, dewa goyona udewa-nubunubui. Ka ataina tau ma' tanopi habuhabui, tau eha Yaubada it'-anamane, idedewei deina. Yai nuanua ikenekenene, ka kadu dewa maimaiovina habuhabuna idedewei, ka kadu daudau bagibagina inimnim ivi-kwavakwava, ka kadu ipatipati^a, ka pati-naia^V nihenia mani tomotau nui idaudauva, eha awawai nui, ka kadu gugua iawa-davedavei, o yaubada vitupu

✧ 4:1: Rom 6:2, 7. ^a 4:3: Vona taina omo dimdim movia. (Edu pati Vona nihenina.)

iawa-davedavei. Ka Yaubada-hoina dewai habuhabui nau-nikonikoiei.✧

4 Ataina idedewei deina, kadu nuai ivi-tupatupa wayahimi, iuna dewaia goyona uvihahaiei, kadu tuta ataina eha nui uta-dedewe. Wayahina, iapa-goyogoyoemi.

5 Kate apaina, tau nau-wawani Yaubada matana imimini, e yai dewa goyo-naia ivo-vi-mahetei. Ka ai dewa-yaiyai ivaniahei tauna wayahina. Iuna tauna ya nuanua mamaei, e tomotau yawayawai kadu tomotau aninigai na-nau-yanahi, e ai nau-pata vi-nua-dadani. Aituhu yai dewa ahiahi, e ai nau-pata ahiahina ivaniahei. O aituhu yai dewa goyogoyoi, e ai nau-pata goyona ivaniahei.✧

6 Dewana wayahina, Iesu iopu omo tau aninigai tanoi wayahia, e Vaneana Ahiahina nau-waheyei wayahia. Tau yai dewa tanopia goyona, ka nonova Yaubada nau-yanahi-neiei. Ka tau ai dewa-yaiyai avaha ivaniahei dewaia wayahi, ka inini avaha ianiga iakwa. Kate Yaubada ya nuanua apaina nuai ividoha, e ima¹-vavaha Yaubada deinake.

7 Ka tuta ataina wayahina avaha dewa habuhabuna tanopi taina wayahina a pai nau-yehata vi-maupwani. Wayahina, nau-wawanimi unuanua tunutunuhina kadu nau-wawanimi yawaimi uveimeyei ahiahina. Aituhu udedewei deina, ami pata uviama ahiahina. Aituhu eha udedewe deina, eha ami pata uviama bagibagina.✧

8 Kadu nau-wawanimi ananina

✧ 4:3: Epe 2:2-3. ✧ 4:5: Dew 10:42. ✧ 4:7: Rom 13:11-12.

udewa-vidovidohemi ahiahina kadu bagibagina. Iuna dewa-vidovidoha dewa habuhabuna vane-tawanei, kadu dewa-vidovidoha ana pata goyona habuhabui na-nua-tavuni.✧

⁹ Ka aituhu avi tuta yaiami uhonei inau-hohona yami manua wayahia, akanai, nau-wawanimi yami dewa-haiawa nui udedewei, ka eha yami nua-vita nui.✧

¹⁰ Yaubada avaha aitamoata aitamoata wayahimia am-venena-kavovo tunina tunina venemi, ka nau-wawanimi am-vene-naia wayahia una-ivaitemi. Ka itomi Yaubada yan' am-venena awawaehina wayahimia uveimeyei tunuhina deina.✧

¹¹ Ka aituhu koiaka wayahimia haehae, tauna nau-wawani haehae Yaubada ana heta haehae deina, ka tauna yana vona nau-wawani Yaubada ana heta ya vonana deinake. Ka aituhu koiaka wayahimia yaiana ivaitei, tauna nau-wawani aituhu avi bagibagi Yaubada n'-awaehei, akanai, bagibagi-nana wayahina yaiana na-ivaitei ahiahina. Iuna yama nuanua ananina dewa habuhabuna wayahina Yaubada an' awa-dava na-nata yaka Kauvea Iesu Tau Ito-yavuha wayahina. Yau viama vivane tauna didigana kadu ya bagibagi ima'-vavaha. Ana pata deina.

¹² Ka yaiau, eha nau-wawanimi unua-tupatupa pai vito-nubu vitai habuhabui wayahia. Avaha nau-dadanaia tanoi uvaniahei. Ka eha unuanua vivane nau-dadanaia ivin'-omo-kavovo wayahimia.

¹³ Kate nau-wawanimi udewa-haiawa vitaia wayahina. Iuna nonova Iesu Tau Ito-yavuha

✧ 4:8: 1Pi 1:22. ✧ 4:9: Ebe 13:2. ✧ 4:10: Rom 12:6-8.

vita vaniahei, ka ataina kadu itomi uvaniahei deinake. Ka munia, avi auyewa tauna didigana na-omo kadueyei, auyewana wayahina udewa-haiawa ananina.✠

14 Ka aituhu tomotau imana-giboemi yami vitumahana Tau Ito-yavuha wayahina, nau-wawanimi udewa-haiawa dewana wayahina. Iuna Didiga Nuana kadu Yaubada Nuana itomi nui umamaei.✠

15 Ka aituhu inahe uvaniahei, eha nau-wawanimi inahena uvaniahe iuna goyona udedewe tau nau-vi-aniga deina, o kadi tau vainau deina, o kadi tau dewa-kavokavovo deina. Tau i yai dewaia wayahi ai dewa-yaiyai ivaniahei akanai, ka dewana tunuhina.

16 Kate aituhu uvi-KirisitianiV, ka aituhu inahe uvaniahei yami dewaia ahiahina wayahia, eha una-ini-yauyau inahena wayahina, kate nau-wawanimi Yaubada un'-awa-davedavei, iuna itomi Iesu ya tomotau.

17 Unononi. Nau-yanahi ana tuta avaha vi-maupwani, ka Yaubada tomotau habuhabuka na-nau-yanahika. Ka dewana vi-putu itoka tau ekalesia wayahikaia, vivane Yaubada ya tomotau wayahikaia. Ka unuani. Nau-yanahina vi-putu itoka tau ekalesia wayahikaia, ka itoka aka nau-pata kavaniahei akanai. Kate aituhu nau-yanahi vitana itoka tau ekalesia wayahika, auyewana wayahina tau i Yaubada Vaneana Ahiahina ivihahaiei medeina? Kaiwadi, tau i dewa-yaiyai ani-vainena ivaniahei, a?

18 Ka Iginuma nihenina ivona deina, ivona,

✠ 4:13: Dew 5:41; Iam 1:2; 1Pi 1:6-7. ✠ 4:14: 1Pi 2:20.

“Eha memeanina tau tunutunuhi
 yai ito-yavuha ivaniahei.
 Ka aituhu tau wayahi deina,
 medeina tau gawagawami ivaniahei,
 o kadi medeina tau goyogoyoi ivania-
 hei?”✧

¹⁹ Wayahina, aituhu aviyaivia inahe ivania-
 hei iuna Yaubada ya nuanua ivaniahei deina,
 akanai, tau nau-wawani nuai kadu yawai ainua
 in^l-awaehei Yaubada ai tau vevewana wayahina.
 Iuna tuta habuhabuna wayahina tauna yana
 vona ka yana dewa aitamoata. Wayahina, tau
 nau-wawani dewa ahiahina idewa-nubunubui,
 eha ibou-oho.

5

Pita Yana Vona Tau Dune-vi-avina Wayahi

¹ Yauke tau ekalesia ai tau dune-vi-avina
 aitam, ka nonova yaka Tau Ito-yavuha ana
 inahe mataua adudueyei. Ka apaina, avi
 tuta wayahina tauna didigana si-vin^l-omanei
 kadueyei, yauke kadue didigau avaniahei tauna
 wayahina. Ka yau vona taina itomi tau ekalesia
 ai tau dune-vi-avina wayahimia.

² Itomi ananiami nau-wawanimi Yaubada yana
 sipiV udune-vi-avini ahiahina. Kadu aituhu
 yami nuanua nui paisewana udedewei, dewana
 ahiahina. Iuna Yaubada ya nuanua wayahimi
 udedewei deina. Ka aituhu yami nua-vita nui
 udedewei, iuna ami veimea mamaei udedewei,
 dewana eha ahiahina. O aituhu yami nuanua

✧ 4:18: VT 11:31.

ananina kina uvaniahei ami nau-pata wayahina, e unua-tania, dewana eha ahiahina. Kate aituhu yami nuanua ananina vavaneimi una-ivaitei, nu-anuana ahiahina.✠

³ Yaubada tauna yana sipiV tanoi awaehemi udune-vi-avini tanopia. Wayahina, eha nau-wawanimi yami nua-vane nui yawai uveimeyei. Kate nau-wawanimi dewa ahiahina udewa-nubunubui, e yawaimi ivi-pai dune ahiahina wayahi deinake.✠

⁴ Ka apaina, avi tuta wayahina yaka Tau Dune-vi-avina Ananina na-omo kadueyei, akanai, auyewana wayahina kadu itomi ami nau-pata ahiahina uvaniahei tauna wayahina, vivane didigami ma'-vavaha.

Pita Yana Vona Tubuao Wayahi

⁵ Kadu itomi tau ekalesia ka tubuao, itomi nau-wawanimi ononotoi anani uvi-ateteyei, kadu yai vona uvi-munieie deina. Ka habuhabumi nau-wawanimi unua-opu, ka kadu aitamoata aitamoata wayahimia una-ivaitemi. Iuna Iginuma haeyeka deina, ivona,

“Yaubada tau nua-vane vito-potai,
kate tau nua-opu n'-ate-nuanuaiei.”✠

⁶ Wayahina, nau-wawanimi unua-opu Yaubada matana, iuna tauna bagibagi-vainena, ka apaina, avi tuta ahiahina ya nuanua

✠ **5:2:** Ioni 21:15-17; Dew 20:28. ✠ **5:3:** 2Ko 1:24; Pili 3:17; Tit 2:7. ✠ **5:5:** VT 3:34; Epe 5:21; Iam 4:6.

wayahina, tauna nimana wayahina na-si-naimi, kadu didigami na-venemi.✧

⁷ Ka aituhu avi tuta ami vita imamaei, akanai, vitai habuhabui wayahi Yaubada uviamei, ka tauna yami viama na-nononi, iuna tauna dune-nuanuaiemi.✧

⁸ Kadue nau-wawanimi aitamoata aitamoata wayahimia yawaimi udune-vi-avini ahiahina, iuna ami havia ananina ana wava Satana mamaei, ka tauna aitam vahitau udaudana ana wava lioniv deina, vivane manimaninina. Ka tuta habuhabuna wayahina tutu-vivivina ka movina ananina tana-gaugau, ka nau-mwanehimi, n'-animi.✧

⁹ Ka itomi nau-wawanimi umimini toyoina, ka Satana unau-voi-onei. Ka yami vitumahana bagibagina wayahina utoha-vi-anaimi, iuna avaha uanamanei, vavaneika Iesu a tau vitumahana papani habuhabui wayahia kadu vita-naia ivaniahe aitamoata deinake.✧

¹⁰ Ka apaina, avaha utoha-vi-anaimi tuta kutakutana wayahina, Yaubada ana heta na-bou-vidohemi, kadu na-vo-vi-toyoimi, ka kadu na-vo-vi-bagibagimi. Ka munia, ami pata umimini-vavaha ahiahina tauna matana. Am-venena awawaehina habuhabuna vin'-omo tauna wayahina. Ka unuani, Yaubada avaha honeka Tau Ito-yavuha wayahina kan'-omo, e Yaubada tauna didigana ma'-vavaha na-vo-pataka.

¹¹ Wayahina, yau viama bagibagi-vavaha tauna wayahina mamaei. Ana pata deina.

✧ **5:6:** Mat 23:12; Luk 14:11; Iam 4:10. ✧ **5:7:** Mat 6:25-30.

✧ **5:8:** 1Te 5:6. ✧ **5:9:** Epe 6:11-13; Iam 4:7.

¹² Yami leta kutakutana taina aginumi, iuna yau nuanua yau vonaia wayahina un'-ate-vatu, kadu yau nuanua un'-anamanei am-venena awawaehina tanoi vivane am-venena awawaehi-hoina Yaubada wayahina kavaniahehi. Wayahina, nau-wawanimi umimini toyoina kadu uvitumahanei ahiahina.

Ka Silasi aitam tau ekalesia ahiahina, ka ya vitumahana eha vitupu, ka tauna ivaiteu yami leta taina aginumi.✧

¹³ Ka kadu tau ekalesia papani taina Babilonia^a nihenina inau-kaiwemi. Yaubada tau vi-nua-dadanei, itomi vi-nua-dadanemi aitamoaata deina. Kadu natu Marika nau-kaiwemi.✧

¹⁴ Kadu aitamoaata aitamoaata wayahimia nau-wawanimi unau-kaiwemi mao ahihinata wayahina, e yami dewa-vidovidoha uviwavenemi deina.

Ka yauke yau viama Yaubada wayahina taina, aituhu aviyaiuia yaka Tau Ito-yavuha idewa-vidovidoehehi, akanai, nua gomagomanina Yaubada wayahina ivaniahehi.

Ana pata deina.

Yauke Pita

✧ **5:12:** Dew 15:22, 37-40; 12:2, 25; 13:13. **a 5:13:** Tau sinasinapui ivoneka *Babiloni* aitam vona baimina *meagai Rom wayahina*. Kadu buki *Si-vin'-omana* nihenina *itomani Babiloni deinake*, ka *tomotau tupwai ivitumahanei an' anamana vivane Rom*. ✧ **5:13:** 2Ti 4:11; Dew 12:2.

Awaeha Vovouna Minaveha Movia
The New Testament in the Minaveha Language of
Papua New Guinea
Nupela Testamen long tokples Minaveha long Niugini
copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 18 Apr 2025 from source files dated 31 Aug 2023

b67aeef-7e9d-566a-9ff5-cb22ab7e2ea4